

四庫全書

史部

欽定四庫全書

明名臣琬琰錄卷七

明 徐紘 撰

禮部侍郎曾公神道碑銘

有序

宋 濂

治古之時非惟道德純一而政教修明至於文學之彥亦精贍完博足以為經濟之用蓋自童丱之始習四經之文畫以歲月期於默記又推於遷固范曄諸書豈直覽之其默記亦如經基本既正而後徧觀歷代之史察

其得失稽其異同會其綱紀知識益且至矣而又參於秦漢以來之子書古今譔定之集錄探幽索微使無遁情於是道德性命之典以至天文地理禮樂兵刑封建郊祀職官選舉學校財用貢賦戶口征役之屬無所不詣其極或廟堂之上有所建議必旁引曲證以白其疑不翅指諸掌之易也自貢舉法行學者知以摘經擬題為志其所最切者唯四子一經之箋是鑽是窺餘則漫不加省與之論談兩目瞪然視舌本強不能對嗚呼一

物不知儒者所恥孰謂如是之學其能有以濟世哉此
漁銘亡友曾公之墓憤激於中而復繼之永嘆也公諱
魯字得之曾其氏也孔門弟子郈公五十七代孫其居
新淦吉陽里者已久世裔之傳與夫轉徙之詳昔以著
於公之先墓茲不重載曾大父兼善宋贈大理評事祖
天騏宋宣教郎軍器監主簿父順元韶州路學教授妣
劉氏公年七歲能諳誦九經一字勿遺奉禮郎簡君正
理欲以神童舉於朝其父止之及齒稍長取三史日記

之尋及其餘數千年間國體治亂人材忠佞制度沿革咸能言之有叩之者如山川出雲層見疊數杳莫察其端倪公殊不以為足所藏子集動至數百家各攬其精而掇其華聞有僻書隱牒不憚道里之遠必購得之既得必篝燈讀之達旦不寐發為詞章麗蔚炳朗毅然有不可奪之氣廬陵劉提舉岳申與之語連日夜不休嘆曰不意後生中能至於斯也其將以文鳴乎杜內翰鄉之丈人行也公負笈從之遊益充拓其所未至寤疑辨

惑惟日不足遂以博極羣書稱於時公猶謂未要於至
道述長書一通謁虞文靖公集於臨川虞公大悅曰昔
程子以張敬夫年十六七即有志聖賢之道子能如是
復何讓古人公年蓋十九矣由是益潛心濂洛關閩之
學分別義理密如蠶絲牛毛而尤愛吳文正公微之書
吳公亦居臨川其著書滿家無大無小公一一訪獲之
玩繹未嘗擇手久之充然有得盤桓林泉以道自娛若
將終身焉至正壬辰天下大亂州縣所在繹騷公召里

諸豪集健兒持兵以保障乎一方仍椎牛醢酒開陳逆
順禍福言甚剋切衆皆聳耳而聽卒無敢犯非義者人
號曰君子鄉入國朝有詔纂修元史勒成一代之典遣
使者起公於家公贊決部居補苴罅漏者不一而足其
功為最多史成上坐端門召諸史臣有白金束帛之賜
公居其首焉公將乞身還山會朝廷開局編類禮書輿
論以老成之士無踰於公者共堅留之議禮之家有如
聚訟自古難定於一公當羣言沸騰之中揚言曰某禮

宜據某書則是從某說則非有不服者爭相辨詰公歷
舉傳記答之各心醉而去俄遷入儀曹為祠部主事階
承事即時洪武二年十二月也常忠武王薨高麗王遣
使來祭公索其文觀之使者靳不與公不可使者不得
已出之外則襲以金龍黃帕內則不書洪武之號公責
之曰龍帕固疑誤用若納貢稱藩而不奉正朔君臣之
義果安在耶使者頓首謝過皆命易去乃已安南來貢
主客曹已受其表將入見公取其副覽之其主乃陳叔

明公曰前王陳日煜爾今驟更名必有以也亟白尚書
諭之使者不敢諱蓋曰煜為叔明所逼而死遂纂其位
中心懷懼故託修貢以覘朝廷之意上叱之曰島夷何
狡獪如此却其貢不受五年二月上問丞相曰曾魯在
禮部今何職邪對曰不過主事爾即日超六階拜中順
大夫禮部侍郎公以順字犯父諱辭就朝請下階吏部
以國法有定不之許倭夷入寇戍將每捕獲之上憫其
無知命儒臣草詔歸其俘公之所撰有中國一視同仁

之語上悅曰頃觀陶凱文已起人意今魯復如此文運庶其昌乎凱禮部尚書也八月奉旨考京畿鄉試入院之後忽吐血一升公猶力疾閱卷不息自是遂奄奄不振九月膏露降鍾山羣臣咸見諸咏歌公獨譔賦以進十月上將郊祀出宿齋宮命取諸作使侍臣更番誦之至公獨曰此曾魯作邪援據既精鋪叙有法豈新進之可驟至哉十又一月疾愈篤上章乞骸骨甚至中書以聞上惻然許之十又二月辛卯歸舟至南昌公謂次子

主曰吾命止明日不能至家矣然吾以一介韋布之士
受國寵恩位躋法從又得守正而斃死復何憾所憾者
不見二孫之成立也即趣觚翰為書戒之壬辰次石政
潭果斂衽而逝距家纔兩驛爾丙申至故居丁酉具棺
斂擇地於縣南屏山之陽以六年某月某甲子祔塋九
世祖高安府君之塋從治命也公蓄德熙和人近之者
溫如春風不見忿戾之色然其人則山澤之癯身退然
若不勝衣未嘗有所矯飾其處家也事親克孝父喪哀

毀致疾踰年而後能起已而二兄諸姪相繼捐館公杖
淚經紀凶事三年間塋十餘喪且撫存其孤惻惟恐或
失其所生平輕財仗義喜周人之急四方賓客日登其
門公倒屣迎之了無倦容嘗一試江西鄉闈有司寘諸
乙榜人為不平而公亦澹如也其出仕精白一心有知
無不為凡典禮涉於制度者必經公損益而後定雖古
者吏牘之繁簡署字之上下人所不能知公獨稽諸書
以為決公誠所謂濟世之學者非耶公屬文不喜留藁

其徒雖有所輯錄猶未成書其自著書有六一居士集
正訛南豐類藁辨誤藏於家他咸未脫藁當公修元史
時濂實為總裁及入南宮又有僚友之好故相知號為
最深共坐官舍更析互辨每至夜分嘆末學之空虛傷
古道之寥落又復相視輒然一笑嚴陵徐尊生嘗有言
曰南京有博學之士二人一以舌為筆一以筆為舌其
意蓋指公與濂也嗚呼尊生過矣濂也何人而敢上儼
於公哉雖然公未常欲棄濂也相期他日幸歸林下胥

會焉共成一書庶可藉手以見前賢公今不可作矣故
因銘墓之文而屢興懷於治古之時也世之讀者必將
深感焉公讀書之室曰守約齋學者遂稱為守約先生
享年五十四歲娶聶氏先二十年卒公再不納配一榻
蕭然如山林枯槁之士人難之子男二人長塾今來請
銘者次即圭出為仲兄後女一人應真適劉奉孫二人
正龍夢龍銘曰氣化糾纏人文昭宣萬類斯甄兮天設
地施一偶一奇形聲相資兮載籍繽紛六藝攸尊各闢

其門兮枝分葉敷散為千塗混其精脩兮彌綸大邦文
物采章有變有常兮不生碩儒孰軋其樞孰苞其腴兮
玉筍之陽神珠吐芒莫自翳藏兮大明麗天束帛多爰
搜羅俊賢兮袞袞鉞誅寓於策書輿論所孚兮儀曹之
升議禮稽經日維烝兮黼黻帝猷上窺殷周功在刪修
兮所積之訖所發之深開陽闔陰兮正笏垂紳其色閭
閭邦之老臣兮媚學躑躑其中惝然何翅霄淵兮天胡
降喪一鑑之亡四國之傷兮其神上征化為列星寒光

鼎焚兮下歟屏山馬鬣桓桓名在不刊兮

誠意伯劉公行狀

黃紀善

公諱基字伯溫世為括蒼人年十四入郡庠從師受春秋經人未嘗見其執經讀誦而默識無遺習舉業為文有奇氣決疑義皆出人意表凡天文兵法諸書過目洞識其要講性理於復初鄭先生聞濂洛心法即得其旨歸先生大器之乃謂公父曰吾將以天道無報於善人此子必高公之門矣後應進士舉授江西瑞州府高安

縣丞揭文安公曼碩見公謂人曰此魏徵之流而英特過之將來濟時器也公在燕京時間閱書肆有天文書一帙因閱之朔日即背誦如流其人乃大驚欲以書授公公曰已在吾胸中矣無事於書也之官以廉節著名發奸摘伏不避強禦為政嚴而有惠愛小民自以為比慈父而豪右數欲陷之時上下咸知其廉平卒莫能害也新昌州有人命獄府委公覆檢案覈得其故殺狀初檢官得罷職罪其家衆倚蒙古根脚欲害公以復讐江

西行省大臣素知公遂辟為職官掾史以讜直聞後於
幕官議事不合遂投劾去隱居力學至是而道益明後
為江淞儒學副提舉為行省考試官頃之建言監察御
史失職事為臺憲所沮遂移文決去嘗遊西湖有異雲
起西北光映湖水中時魯道原宇文公諒諸同遊者皆
以為慶雲將分韻賦詩公獨徒飲不顧乃大言曰此天
子氣也應在金陵十年後有王者起其下我當輔之時
杭城猶全盛諸老大駭以為狂且曰欲累我族滅乎悉

去之公獨呼門人沈與點置酒亭上放歌極醉而罷時
無能知者惟西蜀趙天澤知公才器以為諸葛孔明之
流嘗作文以期之方谷珍反海上省憲復舉公為浙東
元帥府都事公即與元帥納琳哈剌謀築慶元等城賊
不敢犯及特哩特穆爾左丞招諭方寇復辟公為行省
都事議收復公建議招捕以為方氏首亂掠平民殺官
吏是兄弟宜捕而斬之餘黨協從誑誤宜從招安議方
氏兄弟聞之懼請重賂公公悉却不受執前議益堅持

哩特穆爾左丞使其兄子省都鎮猶以公所議請於朝
方氏乃悉其賄使人浮海至燕京省院臺俱納之準招
安授谷珍以官乃駁公所議以為傷朝廷好生之仁且
擅作威福罷特哩特穆爾左丞輩羈管公於紹興公發
憤慟哭嘔血數升欲自殺家人葉姓等力沮之門人密
拉薩巴曰今是非混淆豈公自經於溝瀆之時耶且太夫
人在堂將何依乎遂抱持公得不死因有痰氣疾是後
方氏遂橫莫能制山穴皆從亂如歸公在紹興放浪山

水以詩文自誤時與好事者遊雲門諸山皆有記行省
復以都事起公招安山寇吳成七等使自募義兵賊拒
命不服者輒擒誅之畧定其地復以為行樞密院經歷
與行院判舒穆魯宜孫守處州安集本郡後授行省郎中
經畧使李闕鳳巡撫江南諸道採訪守臣功績奏於朝時
執政者皆右方氏遂置公軍功不錄由儒學副提舉格
授公處州路總管府制諸將聞是命下率皆解體勅書
至日於中庭設香案拜曰臣不敢負世祖皇帝今朝廷

以此見授無以宣力矣乃棄官歸田里時義從者俱畏
方氏殘虐遂從公居青田山中公乃著郁離子客或說
公曰今天下擾擾以公才畧據括蒼併金華則越可折
簡而定方氏將浮海避公矣因畫江守之此勾踐之業
也舍此不為欲悠悠安之乎公笑曰吾平生忽方谷珍
張士誠輩所為今用子計與彼何殊耶天命將有歸子
姑待之會上下金華定括蒼公乃大置酒指乾象謂所
親曰此天命也豈人力能之耶客聞之遂亡去公決計

趨金陵衆疑未決母夫人富氏曰自古衰亂之世不輔
真主詎能獲萬全計哉衆乃定或請以兵從公曰天下
之事在吾之所輔者爾奚以衆為乃悉以衆付其弟陸
陴家人葉性朱佑等叅掌之且曰善守境土毋為方氏
所得也勿憂我適總制官孫炎以上命遣使來聘公遂
由間道詣金陵陳時務策一十八款上從之會陳氏入
寇獻計者或謀以城降或以鍾山有王氣欲奔據之或
欲決死一戰不勝而走未晚也公獨張目不言上召公

入內公奮曰先斬主降議及奔鍾山者乃可破賊爾上
曰先生計將安出公曰如臣之計莫若傾府庫開至誠
以固士心且天道後舉者勝宜伏兵伺隙擊之取威制
敵以成王業者在此時也上遂用公策乘東風發伏擊
之斬獲凡若干萬上以克敵之賞賞公公悉辭不受中
書省設御座將奉小明王以正月朔旦行慶賀禮公大
怒罵曰彼牧豎爾奉之何為遂不拜適上召公公遂陳
天命所在上大感悟乃定征討之計遂攻皖城自昏達

且不拔公以為宜逕拔江州上遂悉軍西上陳氏率其屬走湖廣江州平上使都督馮勝將兵攻某城命公授方畧公書紙授之使夜半出兵云至某所見某方青雲起即伏兵頃有黑雲起者是賊伏也慎勿妄動日中後黑雲漸薄回與青雲接者此賊歸也即銜枚躡其後擊之可盡擒也衆初莫肯信至夜半詣所指地果有雲起如公言衆以為神莫能違竟拔城擒賊而還王漢一以饒信降上命公撫之陳氏洪都守將胡均美使其子約

降諸禁止若干事上初有難色公自後踢所坐胡牀上
意悟許之均美遂以城降初公聞母富氏喪悲慟欲即
歸上以書慰留之期以成功公不得已遂從征伐至是
辭歸上遣禮官伴送累使弔祭恩禮甚厚時苗軍反金
華括蒼殺守將胡大海耿某孫炎等衢州或謀翻城應
之守將夏穀懼無所措會公至即迎入城一夕定之公
即發書金處屬縣論以固守所部遂同邵平章諸軍克
復處城擒苗帥賀某李某處州平公至家營葬事時語

所親以上必當有天下之狀於是鄉里及隣附郡縣翕然心服方氏雖據溫臺三郡其士大夫皆仰公如景星慶雲其小民亦未嘗不懷公之舊德也方氏素畏公名時遣人致書奉禮公不敢受使人白於上上因令公與通問公因宣國家威德方氏遂納土入貢上時使人以書訪軍國事公即條答悉合機宜某年月日公赴京道經建德今嚴州也適張氏入寇時曹國公守建德欲奮擊之公乃使勿擊曰不出三日賊當自走追而擊之此

成擒也比三日黎明公登城望之曰賊走矣衆見其壁壘旗幟皆如故且聞嚴鼓聲疑莫敢輕動公趣使疾進兵至則皆空壘擊鼓者乃所掠老弱耳遂窮追賊迸去至東陽悉擒之以還公遂至京時陳友諒據湖廣張士誠據浙西皆未下衆以為蘇湖地肥饒欲先取之公曰張士誠自守賊耳陳友諒居上流且名號不正宜先伐之陳氏既滅取張氏如囊中物耳會陳氏復攻洪都上遂伐陳氏因大戰於彭蠡湖勝負未決公密言於上移

軍湖口期以金木相犯日決勝上皆從之陳氏遂平上還京定計取張士誠因定中原拓土西北公密謀居多上或時至公所屏人語移時乃去雖至親密莫知其由以公為太史令一日公見日中有黑子奏曰東南當失一大將時叅軍胡深伐福建果敗後他日公見上上方欲刑人公曰何為上語公以所夢公曰是衆子頭上有血以土傅之得土得衆之象應在得夢時三日當有報至上遂留所欲刑之人以待之三日後海寧以城降果

如公言至上大喜悉以所留人俾公縱之某年月日樊
惑守心羣臣皆震懼公密奏上宜罪已以回天意次日
上臨朝即以公語諭羣臣衆心始安後大早上命公諡
滯獄凡平反出若干人天應時雨上大喜公因奏請宜
立法定制上從之張士誠平後張昶欲亂政乃使人上
書稱頌功德勸上宜及時為娛樂上以示公公曰是欲
為趙高也上領之昶色動知公得其情也乃使齊翼巖
時伺察公陰事欲陷之未及發而昶先事受誅及司天

臺災翼巖因為書言之於上其事多公平日密聞於上
或上使為之者翼巖未之知也書奏上切責翼巖斬之
遂治黨與盡得其與昶通謀狀上遣以事責丞相李善
長憲使凌悅因彈之公為上言李公舊勲且能輯和諸
將上曰是數欲害汝汝乃為之地耶汝之忠勲足以任
此公叩頭曰是如易柱必須得大木然後可若束小木
為之將速顛覆以天下之廣宜求大才勝彼者如臣驚
鈍尤不可爾上怒遂解洪武元年正月上登大寶於南

郊公密奏立軍衛法外人無知者拜御史臺中丞適中
丞章公溢奏定處州七縣稅糧比宋制畝悉加五合上
特命青田縣糧止作五合起科餘準所擬且曰使劉伯
溫鄉里子孫世世為美談也或言有殺運三十年公慨
然曰使我任其責者掃除弊俗一二年後寬政可復也
上幸鳳陽使公居守公志在澄清天下乃言於上曰宋
元以來寬縱日久當使紀綱振肅而後惠政可施也乃
命憲司糾察諸道彈劾無所避公案劾中書省都事李

彬侮法等事罪當死丞相李善長素愛彬乃請緩其事
公不聽遣官賫奏詣行在上從公議處彬死刑公承旨
斬之由是與李公大忤上回京李公愬之公乃求退上
命歸鄉里公奏曰鳳陽雖帝鄉然非置都之地王巴拜
雖可取然未易輕也願聖明留意焉遂辭歸後定西失
利王巴拜竟走沙漠上手詔叙公勲伐且召公赴京師
同盟勲冊公至京師上賚賜甚厚追贈公祖父爵皆永
嘉郡公累欲進公爵公曰陛下乃天授臣何敢貪天之

功聖恩深厚榮顯先人足矣遂固辭不敢當上知其至誠不强也上欲相楊憲公與憲素厚以為不可上怪之公曰憲有相才無相器夫宰相者持心如水以義理為權衡而已無與焉者也今憲不然能無敗乎上曰汪廣洋何如公曰此褊淺觀其人可知胡惟庸何如公曰此小犢將償轅而破犁矣上曰吾之相無愈於先生公曰臣非不自知但臣疾惡太深又不耐繁劇為之且孤大恩天下何患無才願明主悉心求之如目前諸人臣誠

未見其可也三年七月授弘文館學士十一月進封城
意伯四年正月賜歸老鄉里二月至家遣長子璉捧表
詣闕謝恩某年某月復遣璉進賀平蜀表頌上仍以文
答之八月上使尅期以書手問天象事公悉條答其大
意以為霜雪之後必有陽春今國威已立自宜少濟以
寬書奏上悉以付史館其書藁并已前奏請諸藁公皆
焚之莫能得其詳也初公言於上甌括間有隙地曰談
洋及抵福建界曰三魁元未頑民負販私鹽因挾方寇

以致亂累年民受其害遺俗猶未革宜設巡檢司守之上從之及設司頑民以其地係私產且屬温州界抗拒不服適茗洋逃軍周廣三反溫處舊吏持府縣事匿不以聞公令長子璉赴京奏其事逕詣上前而不先白中書省時胡惟庸為左丞掌省事因挾舊怨欲構陷公乃使刑部尚書吳雲誅老吏許公乃謀以公欲求談洋為墓地民弗與則建立司之策以逐其家庶幾可動上聽遂為成案以奏賴上素知公置不問省部又欲建公長

子獄上時已勅璉歸及奏上曰既歸矣免之公入朝惟引咎自責而已先是楊憲敗後汪廣洋為丞相未幾而貶廣東乃相惟庸公乃大感嘗謂人曰使吾言不驗蒼生之福也言而驗者其如蒼生何遂憂憤而舊疾愈增洪武八年正月胡丞相以醫來視疾飲其藥二服有物積腹中姬卷石遂白於上上亦未之省也自是疾遂篤三月上以公久不出遣使問之知其不能起也特御製為文一通遣使馳驛送公還鄉里居家一月而薨公生

於至大辛亥六月十五日薨於洪武乙卯四月十六日
享年六十五歲公之子璉仲璟以是年六月某日塋公
於其鄉夏山之原禮也遺文郁離子十卷覆瓿集二十
四卷寫情集四卷長子璉又集所遺文稿五卷名曰犂
眉公集娶富氏封永嘉郡夫人繼室陳氏章氏子男二
人長璉由考功監丞任江西叅政卒於官次仲璟皆陳
氏出已女二人孫男三人廌虎豹孫女三人公未薨前
數日乃以天文書授璉使俟服闋進且戒之曰勿令後

人習也復命次子仲璟曰胡惟庸必敗我欲奉遺表無益也日後上必思我待有問當密為我奏其畧以為修德省刑祈天永命且為政寬猛如循環耳諸形勝要害之地宜與京師聲勢相連絡幸聖主留意公生平剛毅慷慨有大節每論天下安危則義形於色然與人交遊開心見誠坦蕩無間阻至於義所不直無少假借雖親之者以此而忌之者亦以此惟上察其至誠任以心膂公亦以為不世之遇知無不言每遇急難勇氣奮發計

畫立就外人莫能測其機累贊上成大功上嘗臨朝稱
之公輒逡巡不敢當家居惟飲酒奕棋未嘗自言其功
每天象有大變則累日不樂凡公以天下蒼生休戚為
憂喜者即此可知矣上天威嚴重惟公抗言直議不以
利害怵其中上亦甚禮公常稱為老先生而不名又曰
吾子房也廷臣或有過失得譴者公密為救解而免其
人或知而詣公謝者則拒不納其人不知亦未嘗為人
言也其居鄉里守禮義尚節儉多陰德不以富貴驕人

公初與同郡葉公景淵胡公仲淵章公三益金華宋公景濂同出處有通家之好至於居官任政則各行其志俱以功名顯於世而公與宋公又文章為當代首稱云伯生辱在同郡預諸生列於公子璉仲璟相知最深今公薨而璉沒仲璟與璉之子薦請錄公遺事因輯平昔所聞大畧為行狀至於皇上知人之明倚注之重公之遭遇感激以天下公議輔人主者觀綸綍之文考成效之績可見矣其籌策帷幄有不能盡詳者亦不敢強質

也

叅政劉公墓碑銘

蘇伯衡

皇明有佐命勲臣曰誠意伯劉公既薨上嘉念其功不
寘洪武十年秋遂以承務郎考功監丞官其子孟藻後
一月兼試監察御史後二月超拜江西等處承宣布政
使司右叅政未三年竟薨於位十二年六月三十日也
年三十有二上聞之嗟悼不已勅有司護喪反其里親
為祭文命國子生陸居敬致奠其子廌等卜地里西石

門嶺董田之原以是年十一月六日塋焉既而使來屬
伯衡銘其墓上之碑按孟藻姓劉氏諱璉字則孟藻也
處州青田縣人曾祖諱庭槐皇贈中奉大夫中書叅政
知事護軍祖諱煥皇贈資善大夫御史中丞上護軍並
追封永嘉郡公考諱基御史中丞兼弘文館學士太子
贊善大夫加開國翊運守正文臣資善大夫護軍封誠
意伯曾祖妣梁氏祖妣富氏並追封永嘉郡夫人妣富
氏封永嘉郡夫人娶陳氏子男二人長廌次虎女一人

適麗水陳仔孟藻生數歲授以書二三通輒能諳誦後終不忘年十餘為文辭立就奇氣爍爍紙上其師覽之有愧色孟藻器局凝重而識慮宏遠誠意伯之留輦下也孟藻內事母睦宗嫺外應門戶撫鄉里無一不中度於時永嘉為方氏所據鄉之羣無賴子煽於方氏將相挺為變孟藻出其不意先其未發一夕撲滅之無得脫者而閩境遂以奠枕其年才十八耳誠意伯以聞上曰非卿焉有是子誠意伯之得請歸老於家也遣孟藻上

表謝恩召至榻前與語上為傾聽而任用之意昉於斯
矣其年復進平蜀頌入見武樓下內出所製潁川侯傳
友德等文俾持歸示誠意伯別撰進入自誠意伯家居
孟藻將命朝謁無慮八九至至輒燕見上見其進止安
雅占對明敏未嘗不以為賢而極為皇太子所重初誠
意伯請於上曰甌閩之交有地曰談洋僻絕而崑險戎
卒逋逃淵藪也遇民往往螳聚為奸利樹巡檢其地庶
幾人知顧忌可其請執政胡惟庸當國以不關白恨甚

及其封事言郡縣豪猾吏孟藻上之又不先通執政執政愈益恨適有旨逮豪猾吏乃誅使誣誠意伯非法而刑部尚書吳雲等承執政風旨議坐孟藻賴上知其父子深故免誠意伯薨之又明年夏監察御史李鐸以上旨來取其觀象玩占諸書孟藻即日出書石室中索從李御史赴闕奏曰臣先臣基臨終屬臣以書成之日慎勿泄也喪葬事畢其上之臣未及上重煩使者來取臣罪當萬死今悉送官矣唯陛下哀矜上慰諭之曰忠孝

哉其留服事朕孟藻頓首乞賜歸持服賜寶鈔三十貫
遣之皇太子召賜食加賜五十貫秋七月服甫除而考
功丞之命下考核平亭時譽翕然上猶以為散地兼試
監察御史風裁凜凜眷遇尤篤陪祀圓立被旨進勺無
違禮者縉紳多之明日圓丘署丞進瑞粟特詔孟藻與
通政使曾秉政作歌獨孟藻所作稱旨未幾除叅政出
涖江西進階中奉大夫同日除官四百餘人上諭衆曰
劉璉勲臣子操心正大居家奉法歷官著效故委以重

任也顯有異績且入中書矣衆乃始知上於孟藻用之速由知之至而孟藻益感激圖報稱其在江西也同官韓士原貪而苛沈立本儉邪而不知大體孟藻一以忠信介直自處臨事決議不為俯仰雖出語侵之不變一號一令忖度利病便不便而後從違造城磚厲民更其要約而倒縣以解督運吉安布粟兼收而私公稱便繚禁囚徒充斥窮日夜之力䟽理而囹圄以空此尤見褒賞於朝廷者也以此專使來錫監丞叅政命書方屬意

大用之而孟藻憤立本專恣致疾奄至大故庸非民之
無祿而天奪之乎薨之日君子以其方嚮用而遽沒降
年又不永咸涕泣盡傷焉伯衡竊為劉氏先世之積累
至誠意伯而始發誠意伯之遭逢至孟藻而益隆亦顯
矣乎況孟藻能篤其忠貞奮其材猷上結主知濟美先
公生膺峻擢死蒙異數是豈惟當世賢能後來聞風其
未有不歆慕其忠孝者也然則其材雖不盡用其志則
大行其命雖短而其名則已長孟藻復何憾於斯哉今

伯衡以朋友執筆為銘誚也烏得而讓之銘曰聖皇龍
興豪傑雲從運籌帷幄偉哉劉公令德不匱有君為子
繼武而作為天子使君鍾粹美強絕記倫不煩師教肆
筆成文爰自弱冠善謀善斷不動聲色制變將亂事聞
當宁當宁曰嗟允矣肖子亶其克家公雖退休心乎宸
難上表上章君則奔走闕門峩峩出入不呵侍於燕閒
家人莫過上公通候罔不恭敬曰父名臣宜子之令柄
臣憾公獨不已親因事反噬遷怒於君巧詆深文冀罔

天聽君免子辜皇仁且聖求公遺書詔使臨門迺騰迺
橐獻於帝聞皇欲用君君乞終制俞其請矣申錫楮幣
祥琴既御趨而造朝榮以好爵曾不崇朝第宅鞍馬以
莫不賚其官再遷首尾三載君在考功有陟必明君試
御史無回不貞殿彼大藩豈無方伯往叅厥政微君孰
托有兵有民有錢有糧有獄有訟有紀有綱晝思夕惟
不遑啟處何利不興何害不去去害興利民罔時恫頌
聲洋洋達於九重命書來錫昭示崇獎使者言還君以

長往命難諶斯而止乎茲不秉事權以究厥施年與材
違皇用慨嘆遣文祭之親御宸翰恩禮優渥終始哀榮
君又奚恨雖死猶生輝映前人慶延後嗣銘以傳信作
者太史

明名臣琬琰錄卷七

欽定四庫全書

明名臣琬琰錄卷八

明 徐紘 撰

學士承旨潛溪宋公行狀

鄭 楷

先生諱濂字景濂世為婺之金華人其先有諱憲者官大理丞為易講師弟子至數千人唐武德間自京兆尹遷吳興更十四世有諱榮者私諡文通先生通尚書春秋周廣順中從于義烏隱居覆釜山又七世至宋嘉定

初有諱栢者復遷金華其地曰潛溪又五世乃至先生始遷浦江仁義里之青蘿山仍以潛溪扁其所居示不忘本也於是四方學子咸以潛溪先生稱之先生在姪七月即生為嬰兒時苦多病每風眩輒昏迷數日祖母金及母陳更相保抱得免無虞年六歲入小學授以李瀚蒙求一日而盡自後日記二千言同肄業者日暮罷歸其所讀書先生皆成誦九歲為詩歌有奇語人異之呼為神童年十五六里人張繼之長者也聞先生善記

誦邀至別墅所問以四書經傳若干日可通倍先生以
一月為答初繼之不之信抽架上雜書俾即記五百言
先生以指爪逐行按之按畢輒倍一字不遺繼之告先
生之父尚書公曰是子天分非凡當令從明師即有成
爾乃攜入學府受業於聞人夢吉先生授以春秋三傳
之學凡學春秋者皆苦其歲月先後難記先生即并列
國紀年能悉誦之但舉經中一事即知為魯公幾年幾
月是年實當別國某君幾年幾月或俾書而覆之無少

異者且兼通易書詩及周禮諸經先生為舉子業每出諸生右會吳貞文公萊授經於白麟溪上攻古文辭金華胡君翰亦來從學胡君致書於先生曰舉子業不足恩景濂盍來同學古文辭乎先生欣然來從吳公博極經史學之未幾悉得聞奧自是先生文章之名籍然著聞矣居無幾向吳公解館而歸先生嗣主教席子弟年十六者皆相從讀書講道東明山中受業者一門凡四十餘人終始越二十年學成多有躋膺仕者當是時曾

伯祖貞和府君主家政年踰八十端巖方正先生年甫二十有五終日毅然賓主人尤高之府君方著家規示子孫其冠婚喪祭儀制禮文多叅問先生先生則據證古今準酌時宜以成一家之法子孫世守詩禮之教者先生之力也先生嗜學日篤時柳文肅公貫黃文獻公潛皆大儒天下所師仰又各及其門執子弟禮二公則禮之如朋友柳謂公曰吾邦文獻浙水東號為極盛吾老矣不足負荷此事後來繼者所望惟景濂以絕倫之識

而濟以精博之學進之不止如駕風帆於大江中其孰能禦之黃公曰吾鄉得景濂斯文不乏人矣先生所為文多經二公指授柳公謂其渾雄可喜黃公謂其雄麗而溫雅國子監丞陳君旅序先生之文謂能兼二公之所長歐陽文公玄謂非才具衆長識邁千古安能與於斯先生為當時所稱許如此二公相繼即世先生踵武而起遂以文章家名海內矣至正己丑用大臣薦擢將仕佐郎翰林國史院編修官自布衣入史館為太史氏

儒者之特選先生以親老不敢遠違固辭會世亂益韜
閔不事表顯乃與弟子入龍門山著書二十四篇曰龍
門疑道記及著考經新說周禮集註等書初宋南渡後
新安朱文公東萊呂成公並時而作皆以斯道為己任
婺實呂氏倡道之邦而其學不大傳朱氏一再傳為何
簋氏王栢氏又傳之金履祥氏許謙氏皆婺人而其傳
遂為朱氏之學遠先生既間因許氏門人而究其說獨
念呂氏之傳且墜奮然思繼其絕學每與人言而深慨

之識者又以知其志之所存蓋本於聖賢之學其自任者益重矣先生於天下之書無不讀而析理精微百氏之說悉得其旨要至於佛老之學亦所研究用其義趣裁為經論類其語言寘諸其書中無辯也誠意伯劉君基謂其主聖經而奴百氏馳聘之餘取佛老語以資戲劇辟猶飮染肉而茹荼飲茗汁耳歲庚子大明皇帝定鼎金陵遣使者樊觀奉書幣造門徵先生先生曰昔聞大亂極而真人生今誠其時矣遂幡然應詔先生與青

田劉君基麗水葉君琛龍泉章君溢俱見上尊重之語
必稱先生而不名七月以先生為江南等處儒學提舉
十月奉旨入內授皇太子經先生誠明儼恪遇綱常大
義明白開陳再三言之而不倦上深嘉嘆之壬寅八月
上召先生及興國孔克仁講春秋左氏傳畢先生起曰
春秋乃孔子褒善貶惡之書苟能遵行則賞罰中適天
下可定也是月告歸省親有白金文綺之賜且曰卿之
誠懃朕素知之故有此賜耳甲辰十月改起居注先生

侍上左右知無不言補益甚衆明年正月上御端門與先生論及黃石公三畧且口釋之先生進曰尚書二典三謨帝王大經大法靡不畢具願陛下留意講明之上曰朕非不知典謨為治之道但三畧乃用兵攻敗時務所先耳嘗侍上語賞賚先生曰天下以人心為本苟得人心帑藏雖已竭無傷也人心不固雖有金帛何補於國耶上詔丞相李公善長歸江西軍中所掠牛於其民無牛者官給之物其取租丞相退上顧先生曰向所言

事當乎先生對曰民富則君不至獨貧民貧則君何能
獨富捐利於民實興邦之要道也三月先生以疾苦告
詔還家變治仍賜金帛皇太子致贈有加焉先生上箋
謝恩復奉旨皇太子勉以孝友恭敬勤敏讀書無怠惰
毋驕縱修德進業以副天下之望上覽書喜甚召太子
語以書意且賜書答其畧曰曩者先生教吾子以嚴相
訓是為不佞也以聖人文法變俗言教之是為疏通也
所守者忠貞所用者節儉是為得體也昔聞古人今則

親見之復以文綺侑書上每與羣臣言先生淳謹君子
輔導有方眷遇甚隆既而先生丁尚書公憂及服除洪
武二年詔徵先生總修元史六月除翰林學士亞中大
夫知制誥兼修國史時編摩之士皆山林布衣發凡舉
例一仰於先生先生通練故事筆其綱領及紀傳之大
者同列歛手承命而已逾年書成先生之功居多時剖
符封功臣下先生議五等封爵召宿大本堂討論達旦
先生歷據漢唐以來故實量其中而奏之曰此可法彼

不可法皆傳於理而已時甘露屢降上問災祥之故先生對曰受命不易天子之膺休符不於祥於其仁是以春秋不書祥而紀異為是故也上姪文正以荒淫擅殺得罪先生言曰文正罪固當死陛下體親親之義生之而置諸遠地則善矣上嘗言古之帝王當宴安之餘多好神仙以朕言之使國治民安心神怡康即神仙也先生對曰漢武好神仙而方士至武梁好佛而異僧集皆由人主篤好故能致之使移此心以求賢輔天下其有

不治乎上深然之上既追封外王父為闕陽王立廟京師御通天冠絳紗袍以祭祭畢召大臣問曰朕祭外王父卿等以為不當服袞冕何也先生對曰袞冕惟祭天地宗廟用之餘則當降禮也上嘗祀方邱惠心不寧先生進曰孟軻有言養心莫善於寡欲審能行之心清而身泰矣上稱善久之三年十二月遷奉議大夫國子司業國子多大臣子弟先生莅之以莊率之以正日進諸生立兩序據坐執經敷揚闡奧之旨教以孝弟忠信之

道學者帖帖遵度惟恐不得為先生弟子上欲試先生
次吏事四年八月授安遠知縣五年二月召為禮部主
事十二月擢太子贊善大夫階如司業時先生之忠誠
久而彌篤皇太子一言一動皆以禮法諷諭使歸於道
讀書至切於政教及前世興亡之故必拱手揚言曰君
國子民之道當如是不當如彼且推人情物理以明其
義皇太子每歛容嘉納敬禮未嘗少衰言則曰師父師
父云且書舊學二字以賜先是上問帝王之學何書最

要先生請上讀真德秀大學衍義上覽而悅之令左右
大書揭之兩廡之壁時睇觀之六年二月上御西廡大
臣皆侍坐上指衍義中司馬遷論黃老事令先生講析
俾在坐者聽之先生既如詔復言曰漢武嗜神仙之學
好四夷之巧民力既竭重刑罰以震服之臣以為人主
能以義理養性則邪說不能侵興學校教民則禍亂不
作矣刑罰非所先也上謂先生曰朕之為君上畏天地
下畏兆民兢兢業業不敢自逸先生對曰陛下此心古

先哲王之心也書曰予臨兆民凜乎若朽索之御六馬
為人上者奈何不敬正謂此耳願陛下慎終如始天下
幸甚上御齋室先生侍坐上問三代歷數封疆之脩短
廣狹先生歷言之且曰三代之治天下也以仁義故歷
年之多後世莫及上從容謂曰皇太子留心治道卿等
宜常與議論庶廣識見幸善調護之先生益孜孜弗懈
七月陞翰林侍講學士中順大夫知制誥同修國史仍
兼贊善大夫先生之父文昭贈中順大夫禮部侍郎母

陳氏贈德人先生奉詔搜萃歷代奸臣之蹟編為辨奸錄及進太子諸王各分賜焉初上作祖訓錄至是成命先生作序諭以大意先生歷言帝王之道及皇上創業之艱以致箴戒之意於後人上稱善命刻於篇先生嘗侍上後苑觀稼上曰農事成矣先生對曰國以民為本民以食為天陛下知稼穡之艱難而念民生之良苦實盛德也上問曰三代以上所讀何書先生對曰上古載籍未立不專誦讀而尚躬行人君兼治教之責躬行以

率之天下有不從教化者乎八月奉旨纂修大明日歷
一百卷擇言行之大者為寶訓五卷先生總裁其事朝
夕禁中至七年五月乃成先生自以布衣沐非常之遇
誓竭誠以報國凡上有所任使靡晝靡夜躬閱載冊書
於牘進之或覆視於冊一字不遺先生在朝日久若郊
社宗廟山川百神之典朝享宴慶禮樂律歷衣冠之制
四夷朝貢賞賚之儀及勲臣名卿焯德耀功之文承上
旨意論次紀述咸可傳於後世先生在上前所陳說不

為文飾隱蔽雖家事苟有問亦一一道之嘗曰君猶父也天也其可欺上嘗問昨日飲酒否座客為誰饌為誰何物悉以其人及膳羞品對上笑曰卿飲時朕令人視之果如卿言卿信不欺我故上久而益信其誠欲俾參大政先生辭曰臣少無他長惟文墨是攻今幸得待罪禁林陛下之恩大矣臣誠不願居職任也上愈厚之每燕見必命茶賜坐每旦令侍膳詢訪舊章講求治道或至夜分乃退先生屢有所建明召問廷臣臧否第言其

善者不置又問否者為誰先生曰善者與臣交故知其
否者縱有臣不知也卒無所毀短或命賦詩為文必寓
忠告嘗奉制詠鷹令七舉足即成有自古戒禽荒之言
上忻然曰卿可為善諫矣然先生絕不以語人至於應
制之作亦不留藁署溫樹二字於居室之壁有問及內
事者指以示之上嘗與先生飲先生素不勝杯勺舉觴
即辭上強之至三觴面如赭行不成步上歡笑親御翰
墨賦楚辭一章以賜仍命侍臣咸賦醉學士歌且曰俾

後世知朕君臣同樂若此也甘露降上召先生賜坐上躬執金杓煉湯於鼎以甘露投之手注於卮以賜先生曰此和氣所疑能愈疾延年故與卿共之耳皆異恩也九年六月上以先生久典制作宣勞為多特拜翰林學士承旨嘉議大夫知制誥兼修國史上每謂先生曰朕以布衣為天子卿亦起草萊列侍從為開國文臣之首俾世世與國同休不亦美乎趣令取孫官之先生屢辭謝不敢奉詔是年某月詔徵先生冢子瓚之子慎為殿

廷儀禮司序班未幾復召介子璵除中書舍人上時休
暇輒命題試璵與慎而戒飭之上笑語先生曰朕為卿
教子孫先生或奏事久稱倦上命璵慎共扶下殿祖子
孫三世皆官內廷當世以為異事復以先生艱於行步
特詔皇太子選良馬以賜上親作馬歌復詔羣臣咸作
之以寵焉先生益感激不自寧常戒子孫曰上德猶天
地也將何以為報獨有誠敬忠勤畧可自効萬一耳上
以先生年且至不可煩以事十一月有致政之詔乃加

贈先生之父侍郎為嘉議大夫禮部尚書母德人為淑人祖德政贈亞中大夫太常少卿祖妣金氏贈淑人夫人賈氏封亦如之先生及二代誥辭皆上所親製天下榮之誥辭中稱先生德量之弘如千頃波澄之不清撓之不濁人以為上知人之明云先生行既有期上眷念尤深曰卿去何時復來見朕乎幸相待數日姑徐徐行由是朝夕左右者累月時詔許言事朝臣有上疏萬餘言者上聽厭其迂愆怒欲罪之以問羣臣有阿意者指

其疏曰此不敬此詆謗罪當誅上答之而罷怒未解召先生先生曰彼應詔上疏其心忠耳為可深罪乎上默然已而上覽疏中有足采者召阿意者罵曰吾怒時若等不能諫乃激吾誅之何異以膏沃火向非宋景濂之言豈不誤罪言者耶上嘗廷譽先生曰古之人太上為聖其次為賢其次為君子若宋景濂者事朕十有九年而未嘗有一言之偽誚一人之短寵辱不驚始終無異其誠所謂君子人乎匪止君子亦可謂之賢者矣在廷

之臣皆以為信然十年二月先生遂辭歸瀕行賜紙幣
文綺及御製文集皇太子贈以衣三襲上諭曰朕最慎
於賞予嘉卿忠誠可貫金石故以是賜卿卿今年幾何
矣先生曰六十有八上曰藏此綺俟三十二年後作百
歲衣也先生即叩首謝上復屬曰大江漲不可舟卿宜
循內河達家庶幾無虞仍俾慎護先生行先生至家即
拜表遣慎詣闕稱謝仍上箋皇太子申明正心治國之
要上賜詔褒答大旨謂先生忠良之臣勲業既著文章

必傳功成身退惟先生獨全初先生將辭請歲一來朝
是年九月朔先生遂入朝越十又四日見於端門上行
想已久廷問累矣及見大喜加勞再三皇太子諸王皆
驩動顏色越翌日上降勅符遣儀曹奉醪膳諸物抵寓
館以賜自是日侍上遊歷觀闕盤旋禁籞詢諮備至便
殿侍食日宴始退恩禮之優羣臣莫敢望上嘗喟然嘆
曰純臣哉爾濂純臣哉爾濂方今四夸皆知卿名卿其
自愛先生避謝不敢當凡所陳論皆古之格言朝廷百

官惟恐不留先生下至寺人衛卒見先生至皆以手加額相推排迎拜恐不得先覩先生留朝七旬餘上重先生還而難言之先生以歲暮力辭還復遣中貴人賜上尊至於道所經行皆上為先生指畫聖心惓惓愈加於昔及先生既行數日上問璩曰爾父道中無恙否璩以安對未幾復謂璩曰朕疇昔之夜夢見爾父笑談如曩時爾父雖去其容儀儼然在朕目中璩叩頭謝曰非陛下垂念臣父之至何以形諸夢寢中書舍人史靖可太

子正字桂彥良等皆為詩歌以紀之上之眷重先生不
忘如此先生德尊而不居位顯而彌恭既司制作之柄
造門求文之士先後相繼蠻夸朝貢者數問先生安否
日本得潛溪集刻板國中高句麗安南使者至購先生
文集不啻拱璧而先生欲然自持似不能言者遇人拜
雖三尺童子必誦膝而首下垂至於公侯貴人則未嘗
降不曾一識其門何向朝廷有大議閭閻引古今辯說
不少有所回性命之理晚而益究其極外物之往來視

之若不相干嘗曰古人之為學使心正身修措之行事
俯仰無愧而已繁辭復說道之蔽也先生作事不尚表
襮務合乎義教人皆隨其質而道之便入於善尤篤於
倫品處父子兄弟夫婦之間者皆可為法與人交和易
任真無鉤距縱為所紿亦弗與較臨財廉非其分不取
大書於門曰寧可忍餓而死不可苟利而生君子以為
名言權要及有力者苟非其人雖置金滿索求一字不
肯與縱不得已與之亦不受其餽謝日本使奉勅請文

以白金為獻先生却不受上以問先生先生對曰天朝侍從之官而受小夷金非所以崇國體也上深然之貧賤人情有可哀欲發潛振幽即欣然為之先生四持文衡試天下士得人為多接引後學惟恐弗及遠方來者授館而飲食之雖久不衰有小善必衆譽之色溫氣和近其側者如大寒之加重裘盛暑之濯清風也天下之能文者多經先生指授朝廷英俊咸以先生為法初奉勅教文華生數十輩至是出參大政為御史知列郡者

相望四方士得一見先生夸於人以為幸承一言之賜者人輒改觀視之不敢與齒士大夫言當世有德者必曰先生而天下之人識與不識無賢愚咸推先生為大人長者及先生歸上面發後學無師之嘆蓋先生之道內誠外恕一出於正發之也當而行之也安故上下信服若是云雖已貴顯平居布衣蔬食無異貧士先生細目美髯狀貌豐厚不為奇異行以求過於人不事生產不置田宅或勸為子孫計先生曰富貴豈一家物哉吾

乃所以遺之也先生惟刻意於學自少至老未嘗一時
去書不觀及致政歸清蘿山闢一室於靜軒終日閉戶
纂述人不見其面戒子孫毋至城市姻婭有以郡縣事
為托者皆峻謝之或談及時事輒引去不與語切於仁
愛聞民有困乏者為之不飽先生視近甚明夜然燈於
几卧絺帷中閱蠅頭小書一黍土能作十餘字皆可辯
點畫人以為先生不飲酒寡嗜欲所致豈或然歟先生
所著文有潛溪集四十卷蘿山集五卷龍門子三卷浦

陽人物記二卷已傳於學者翰苑集四十卷芝園集歸田已後所著計四十卷十三年冬先生孫慎以罪被刑舉家當寘重辟上念先生特降赦安置茂州十四年五月二十日先生以疾卒於夔府臨歿端坐歛手而逝當是時夔之府守官吏皆來賻贈哭奠塋先生於夔府之西蓮華池山下其經紀喪塋刻石表墓者則知事桑以從也先生生於至大庚戌十月十二日享年七十有二娶賈氏前先生一年卒塋青蘿山子男二長瓚次璵有

文行精篆隸真草四體書孫男慎愷恂懌嗚呼楷自垂
髫時嘗侍先公真孝府君拜先生於牀下先生不以童
子無知即辱進教之親承化育於茲有年矣第懼才質
凡庸如望洋有孤父師之教今聞先生謝世長慟莫知
所從竊念先生道德文章固已顯著於當世其出處遭
逢行事之盛世係遷徙生卒歲月之詳尚恐人未盡知
爰敢哀取翰林待制王公偉先伯父太常博士諱濤君
舊著小傳及同門友人所作歷官記輯為行狀一通俟

請當代立言君子著為碑銘表諸墓隧庶幾他日太常
國史有所采擇焉

明名臣琬琰錄卷八

欽定四庫全書

明名臣琬琰錄卷九

明 徐紘 撰

行省叅政陶安傳

失 名

陶安字王敬姑孰人少敏悟有大志博涉經史尤深於
易元季嘗試於有司為明道院山長再調高節書院秩
滿避亂家居沉涵道藝賦咏自樂若將終身乙未夏六
月太祖起兵自和州渡江取太平路安與耆儒李習率

父老出城迎安見上狀貌謂諸父老曰龍姿鳳質非常人也我輩今有主矣上召與語時事大悅安因獻言方今四海鼎沸豪傑並爭攻城屠邑互相長雄然其志皆在子女玉帛取快一時非有撥亂救民安天下之心今明公率衆渡江神武不殺人心悅服以此順天應人四行弔伐首取金陵以圖王業天下不足平也上曰諾授安天下興國翼元帥府令史丙申秋七月己卯朔諸將奉上為吳國公以元御史臺為公府置江南行中書省

上兼總省事以安為員外郎晉叅幕府從克金陵會丁
母夫人憂服闋授行省都事尋陞左司郎中贊畫之功
良多上既得劉基宋濂章溢葉琛四人因問四人者何
如安對曰臣謀畧不及劉基學問不及宋濂治民之才
不如章溢葉琛上多其善讓癸卯黃州平上思得重臣
以鎮之曰無愈安者遂命知黃州至則寬賦稅省徭役
民悅服之改桐城令尋移知饒州時方征伐急軍需安
勸諭率其民民皆樂輸而用不乏適閩寇至攻城安諭

父老率子弟固守俟援兵至擒其衆諸將以鄉民多從賊欲屠之安曰民為所脅耳奈何殺之由是民皆得全四境以寧上嘉其功御製詩以示褒美遣使往勞明年入朝命復守饒州民懷其德建生祠事之吳元年初置翰林院首召安為學士凡國家制度禮文之事多所定擬御製門帖賜之曰國朝謀畧無雙士翰使文章第一家戊申上即皇帝位建元洪武春正月詔修大明令公為議律官是月辛巳安與中丞劉基言於上曰遠聞倣

元舊制設中丞令欲奏以太子為之上曰取法於古必
擇其善者而從之苟惟不善而一槩是從將欲望治譬
猶求登高岡而却步渡長江而迴擢豈能達哉且吾子
年未長學未充更事未多所宜尊禮師傅講習經傳博
通古今識達機宜他日軍國重務皆令啟問何必效彼
作中書令乎上因謂詹同等曰朕今立東宮官取廷臣
勲德老成兼其職老成舊人動有典則若新進之賢者
亦選擇叅用夫舉賢任才立國之本崇德尚齒尊賢之

道輔導得賢人各盡其職故連抱之木必以授良匠萬金之璧不以付拙工於是以李善長等兼東宮官乃諭曰昔周公教成王告以克誥戎兵召公教康王告以張皇六師此居安慮危不忘武備蓋繼世之君生長富貴泥於安佚軍旅之事多忽而不務一有緩急罔知所措二公所言不可忘也上一日御東閣安與中丞章溢等侍因論前代興亡事上曰喪亂之源由於驕侈大抵居高位者易驕處佚樂者易侈驕則善言不入而過不聞

侈則善道不立而行不顧如此者未有不亡卿此論深
有契於予心古者今之鑑豈不信歟上與儒臣論學術
安對曰道之不明邪說害之也上曰邪說之害道猶美
味之悅口美色之眩目鮮不為所惑自非有豪傑之士
不能決去之也戰國之時縱橫捭闔之徒肆其邪說游
諸侯諸侯急於功利者多從其說往往事未就而國隨
以亡此誠何益夫邪說不去則正道不興天下烏得而
治安曰陛下所言深探其本上曰仁義治天下之本也

賈生論秦之亡不行仁義之過夫秦襲戰國之餘弊又安得知此二月壬寅朔中書省臣李善長傅獻泊安等進郊社宗廟議其圜丘之議若曰今當尊古制分祭天地於南北郊冬至則祀昊天上帝於圜丘以大明夜明星辰太歲從祀其方丘之議若曰今當以經為正擬以今歲夏至日祀方丘以五嶽鎮四海四瀆從祀其宗廟之議則若曰今擬四代各為一廟皆南向以四時孟月及歲除凡五享孟春特祭於太廟孟夏孟秋孟冬歲除

則合祭於高祖廟其社稷之議若曰今宜祭以春秋二仲月上戊日皆從之安又奏古者天子五冕祭天地社稷諸神各有所用請製之上曰五冕禮太繁今祭天地宗廟則服衮冕社稷等則服通天冠絳紗袍餘不用時有御史言安隱微之過者上曰朕素知安安豈有此且爾何由知之對曰聞之道路上曰御史但取道路之言以毀譽人以此為盡職乎命黜之中書省臣進曰御史職當言路言之有失乞容之上曰不然夫植佳木者必

去蟬窟長良苗者必芟稂莠任正大者必絕邪人凡邪人之事君必納以小信而後逞其大詐此人常有所言朕不疑而聽之故今日乃為此讒言夫去小人當如撲火及其未盛而撲之則易為力不然則害滋大矣竟黜之某年還江西行省叅政汪廣洋於山東以安代之時江西諸郡縣初下安鎮定之有法軍民帖然得恩追封其祖父父為姑孰侯祖母母為姑孰侯夫人某年安有疾既劇猶草時務十事上之九月戊戌卒於官上聞之

憂悼親為文遣使祭之時年五十九事載國史論曰自古帝王之興伐暴救民以安天下雖其智勇神授動有定畧要之艱難草昧之初人心未定所以啟迪淵宸者亦不能無賴於英雄豪傑之助若董公說高帝為義帝發喪誅無道秦之類者是已然我太祖之興比之漢高抑又過之蓋元主入統華夏百二十餘年衰亂之後我太祖出而順天應人奠安中外當時奔走禦侮推誠効力如徐鄧湯常李沐諸公勲業烜著然謨謀帷幄自誠

意伯劉公之外如叅政陶公者亦不可多見方其避亂
家居賦詠自若樂將終身其與耕莘釣渭同一揆也及
其遇我太祖乃能審識真主首從義旗因說以弔伐安
天下為心一見之頃兩言而合不數年間削平禍亂登
斯民於衽席以立中國帝王萬世之業其視鳴條牧野
之役夫何異乎然則董公之說不足言矣曩嘗得公之
文集於當塗縣博張祐獲觀永樂間刑部侍郎劉辰所
進事蹟及銘山宮贊費先生序語因類萃成篇庶幾一

覽得以仰見明良相遇之盛焉

文淵閣大學士朱公言行錄

楊 蘄

朱善字備萬江西豐城人國初仕至文淵閣大學士卒年七十有二先生少聰穎不好弄好讀書十歲作文通四書五經大義祖洞雲先生嘗指以示人曰吾是孫他日必為令器壯年以經學授徒壬辰兵變隱居鄉里養親教子之外惟著書立言以聖賢道學之傳為已任著述有詩經解頤詩經輯釋史輯等書奉繼母李氏克盡

孝道壬寅亂劇扶母逃竄十餘日兩全無恙人謂孝感

所致

聶鉉撰墓誌

皇上平定天下開設學校豐城仍舊為富州州守強侯
憲中延公訓導南昌守許方延至郡庠皆有成效大府
以名聞於朝授職教授洪武八年起取赴京師廷試第
一除授翰林修撰署院事知制誥逾年以家屬不完謫
教遼東公畧無愠色方且日賦詩文有遼海集未至遼
城賜還鄉語子逢掖曰汝力耕以供賦役我取汝祖所

著皇極經世等書而考証之十七年天子思用老成驛
使召公授翰林待讀十八年奉旨校文禮闈撤棘之日
授奉議大夫文淵閣大學士是年九月邁危疾上命醫
治月餘疾增劇逢掖詣闕上訴蒙上賜告歸臨終起坐
加冠帶舉手加額曰感荷聖恩無以報效言畢而逝卒
之前鄉人望見有星如虹墜於所居之室衆咸謂大星
之墜以到家之日計之得九十日

墓誌

國子祭酒宋先生墓誌銘

劉三吾

國子祭酒宋先生卒既往哭弔居數日博士吳守德持學正朱惟嘉所狀先生行實來曰先生嗣子麟疾在苦次不得先以請茲將歸寔滑之永寧阡惟翰林兄長吾於先生為同舍故懇銘焉尚憶走始來時會先生於春坊先生曰得毋與劉長吾為兄弟耶不然何面貌之似也相與感嘆久之嗚呼先兄以後至元丙子入監周旋十有五年中間纔兩歸江南爾在監舍法以其同時為兄弟以兄弟相知為世契則走於先生忍銘不忍乎按

狀先生姓宋氏諱納字仲敏世本衛之山楊人後徙滑
家焉兩世繇貤恩贈嘉議大夫禮部尚書上輕車都尉
追封京兆郡侯諱德仁其曾祖贈中奉大夫河北江南
等處行中書省叅知政事護軍追封京兆郡公諱宣其
祖官中奉大夫陝西諸道行御史臺侍御史贈推誠秉
義守正功臣通奉大夫江浙等處行中書省叅知政事
護軍追封魏郡公謚忠肅諱崇祿其父忠肅在元時駁
歷中外四十餘年五持憲節逮事七朝豐功盛德所以

燾後衍慶神道碑紀之悉矣先生濡染家教動以矩矱雅性持重不妄言笑齒貴曹館以來所師宗工碩儒月開日益卓然有成擢科登仕為時聞人中經繹騷乃被褐懷寶以自韜晦皇明受祚徵詣公車召見次有言動聽洪武之十二年也是冬除國子助教橫經發難擊節廓塞學如客得歸嘗同諸儒應制撰勅文畀僧道錄司領教事者十有六通操筆立成雅稱上意起授翰林學士奉議大夫俄陞文淵閣大學士日見親信有所補拾

會建太學成中外歲貢學徒日夥而職大司成者往往
選懦師生相訐教尼不行宸衷簡注擢為祭酒陞朝列
大夫以釐正前弊上自製誥詞至以尚父興周八百儼
之感惟眷遇所以提挈鏖硜不遺餘力師道既立皇心
載寧乙丑戊辰兩科得士大率三天下之二而龍頭魁
選恒在太學大被賞遇一日有疾上遣中使致諭其畧
曰卿稟天命之性發仲尼之誠施已之幽德脩道教人
所以病不病而速差以其有神也天章下賁光輝儒紳

恒謂祭酒骨格必壽適有畫工至命繪其像肖焉喜溢
天表然終老之以其子麟主望江簿特勅召之還俾便
侍養其被遇優渥類此方倚之以棟梁我道楷式諸生
也不謂得疾旬日遽不可起病也尚醫來治卒也遣官
致祭其文悉上所自製故事文臣四品無給賞費者曠
典之舉昉自先生斯皆異數也居嘗飲食恒在廂房未
始一宿於家及是疾革麟等托諸監官懇請其還勵聲
曰是何風雲氣少兒女情多況在丁社兩祭齋戒中耶

至是祭畢乃就舁歸一不口及家事及家氣絕焉二月
之三日昏暮時也嗚呼先生以八袞之年當易簀之際
而風雲為氣不少衰丁社兩祀始終齋戒是持非其平
日操存有素詎能方寸不亂若是哉可謂真大丈夫矣
取其平生所裒集先世碑銘傳紀曰紀德錄一集所自
著述曰西隱集十又七卷既號西隱復別號所居別業
曰白雲茅屋自法書名畫外他無所嗜好中朝名儒詩
若文讀一二過輒能記憶不減少時今皆已矣生以元

至大辛亥十二月四日卒以今洪武二十三年春壽八十配康氏先卒子三人長衍祖即麟擢進士第拜監察御史出主望江簿次復祖鄉邑訓導次安祖女一人在室孫男三恕慧懋女孫四曾孫男女各二皆幼臨發柩時上再遣祭舟車之費一出於官可謂生榮死哀也已銘曰銅臺世家忠肅公挺生賢嗣遭時雍身逢堯舜接夔龍代言文淵掌辟靡感惟皇上倚注隆率先條約自其躬風雲氣槩冰霜容教行六館諸生從金石文章錦

繡胸蔚為海內諸儒宗譽髦多士振文風棟梁斯道伊
誰功夫何一疾遠罹凶至尊為之惻淵衷命醫與祭恩
禮豐年登八十善考終歸定祖塋得幽宮銘阡者誰青
藜翁子孫世世其吉逢

吏部尚書陳公墓誌

解縉

余奉詔纂修太祖實錄觀自歲癸卯戡定陳氏彭蠡之
戰至動星象衆庶咸見而四方豪傑之士雲合響應輻
湊而爭趨之雖湯武之得士未能如是何其盛哉至歲

甲辰即王位而浙江取次平若廣信陳公修太祖之尤
注眷者也是以首擢理官講畫律令崇寬厚而省繁苛
復倫要而黜姑息簡明正大四方翕然知有一統之制
作由此始焉繼而又謂兵刑之大者也唐世府兵之制
稍為近古而未精密乃擢公兵部郎中而所以任將帥
養士卒得內外相維之體兵農相資之意遂為萬世之
法而公之昭顯成德益以著焉太祖初即位山東新下
念濟南重經王氏之亂民墜塗炭尤甚大將多練兵屯

田其間非公莫可治也遂權濟南知府居二年而政成
太祖嘉之以天官六曹之長而明習經制建官均職惟
公是宜權拜吏部尚書引據古典參酌時宜審地劇易
制事繁簡貴賤踈數遠近寬嚴課功覆實賞錫黜陟之
類皆公啟之未幾卒於位繼之者莫能移易也予嘗謂
太祖之治天下也其事有緒而若素定於畎畝之中誠
所謂天授之者而一時勛舊臣高才碩德道全方備皆
非近世之所能髣髴其一二者也於戲盛哉今尚書公

沒四十餘年始得其子九成為之狀求為之刻辭於石
按狀陳氏自彬始有聞於信之弋陽生應隆應隆生文
光號南隱贈迪功郎生萬里字德甫號梅間任信州路
歷山長教授贈黃巖州知州生三子曰誼曰天驥曰敏
學字志仲號亦梅官至平江總管府治中生弘字仕遠
蔭韶州路乳源縣主簿公之父也母張氏公生至正辛
酉九月十九日沒於洪武辛亥七月十三日享年五十
又一塋梧桐塢夫人楊氏今年九十餘公沒二年九成

奉母隱居於桂徙南寧今家於貴縣之郭門有子三人
曰鏞曰銘曰鐸鏞之子璉銘之子瓚鐸之子璫為之詞
曰廣信之山龍虎鬱盤弋陽九華連峯巒岼篤生偉人
逢時經綸審所宜歸乘運躍鱗聖人好生明刑勅法與
定章條惟存欽恤制兵之宜因仍歷世寓農講武經久
無弊山東初下兵民雜居朱輜皂蓋往來撫綏期年政
成歸掌銓衡平均四海位冠六卿我納石室用纂六經
敬服德業副其聲稱著之簡冊復為此銘邦家之光閭

里之榮

戶部尚書郁公神道碑銘

解縉

國朝復先王之典禮所以付任才能用長舊典裁成輔相以全天下之士保其初終恩兼新故大小之臣咸稱職業班班有可稱道者豈惟天祐國家而賜之多賢亦國家深仁厚澤有以積累克稱天心也嗚呼豈不盛哉乃洪武戊辰歲予以年少擢進士為中書舍人直翰林日侍講華蓋殿中時時引選官居前講官不避即顧問

可否輒以直對一日見鳳陽郡公於儕衆中資貌瓌偉
音吐濃暢威儀整齊知心異之上果賜名新即命戶部
度支主事度支掌內幣賜予內直所與文淵閣相邇也
會嘗與議論練達經歷久相善也未幾公陞北平部郎
中先是戶部其屬有四是歲分為十二次有是命進階
奉議大夫二十四年起授嘉議大夫戶部侍郎每奉事
廷中玉音顧問天下地理陰陽戶口遭運之數民間利
害無巨細皆嚮應無或遺謬在廷之臣莫不以為難而

歟然每事啟度其屬能者未嘗以精敏自多名位自高人又莫不以為難及考滿遂陞尚書益寬大得體不為鎖屑授資善大夫喪母歸葬鳳陽賓客至者數郡盖公平生慷慨急於義饒財而好施尊禮儒生雅喜交遊從不為冷熱變親戚有急難不避治家有法綜理微密而不傷於繁雖國家能曲成人才如公之才亦可謂難能者也今永樂三年八月五日公卒於官上賜樽斂祭之為素服輟朝一日士大夫咸以為榮公本蘇州吳縣人

曾祖和祖仲瑜父字銘本母某氏祖父以洪武初遷
鳳陽公隨而家焉公娶嚴氏尤善理家公於家事不以
為言而井然有條無不舉公生至正丙戌正月十四日
年六十子彬字孟文將奉公之柩歸塋於鳳陽臨淮公
嘗托子銘其墓而神道之碑亦不可不刻也乃序而銘
之詩曰泰運肇開賢彙生巨細咸具勲業成有奮布衣
位六卿寬欲強敏豈惟承有善不伐責已盈人道不惡
天所矜有崇斯阡其永寧

翰林學士劉三吾傳

劉三吾名如孫三吾其字也別號坦齋素以字行系出宋楚國公之裔世為茶陵人大父平埜父芄翁皆宿學兄長吾以上舍教宜庠存吾登庚午進士令臨武元末俱死節三吾美鬚髯有雲鵬海鶴之姿性情警絕文藻天縱方其未遇也以志節自厲陶寫性情自娛著表忠發微正氣諸書知非化鶴諸集流寓嶺南十有四年始以鄉貢辟為廣右掾當壬辰癸巳流離饑饉之歲與芄


翁父子兄弟自相師友雖在擾攘不廢文墨及我太祖
高皇帝定鼎金陵大召名儒三吾幡然應聘而起日與
宋濂詹同孫賁輩侍上左右眷顧特隆朝廷設科取士
三場四書經義論詔誥表判策三吾多所刊定因著學
業啟蒙嘗被旨考正周禮纂書傳會選及諸功臣神道
碑銘多命三吾為之屢典文衡充讀卷官某省有進嘉
禾三吾時侍經筵首進嘉禾賦其辭曰皇上以一心之
和形而為庶徵之和年穀順成靈貺昭格天人合應遠

通騰權蓋聞水陸草木之英為瓜為蓮所茁必駢所毓
必雙矧是嘉禾為五穀之長文者異本而同秀質者同
本而異秀是謂仁卉其莖當輝芒而森森鋒起其穎常
結實而顆顆珠明莖之森也日出瑤空漏萬頃黃金之
鎖碎穎之結也露下璇室連一色碧玉之晶熒蓋天惟
發祥故特以是兆來歲之豐稔地不愛寶故以是開萬
世之太平也茲祥也其在成周則異畝同穎于地為陶
唐其在炎漢則一莖九穗於地為洛陽信地利之所鍾

在天意之靡常往聖有德必於往聖而感應今聖有德
必於今聖而闡揚聖莫聖於大明朝之君靈莫靈於今
天子之都廬嶽效靈仙醫進劑聖躬奏效於萬安國祚
永綿於周世嶽靈假昔者而有言謂自今以往國家祥
瑞種種相繼信斯言也宜郡國所奏之禎祥前後不一
至而至皇上曰噫我茲開國不尚靈異惟民之安年之
豐乃為朝廷之盛事猗猗嘉禾惟穀之精其大盈箱協
種禾莖昔生周朝今來明廷獻之廟堂以昭祖靈則以

是禾昭格有廟者以生民命脉之所本有國生業之所
自也既告宗廟乃敕太官飯抄雲子供入御餐所以必
熟而薦者不敢虛其賜必昭受上帝也自今以始穫之
秬秠積之粟粟其崇如墉其比如櫛以開百室此又可
見嘉禾之祥為豐年之兆而詠歌於良耜之什也抑茲
祥也其在唐宋必付書史館必繪而為圖今國家不圖
之圖而圖以九州四海一桑麻雨露之區不史之史而
德澤在人心芳馨在史冊自有千萬世口碑之紀遂為

之歌曰天心降祥兮萬宇雖和地靈效珍兮所在嘉禾
自今國其有年兮維此之瑞不厭其多斯豈不愈於漢
廷赤雁之賦芝草之歌洪武二十年二月甲辰上命儒
臣書洪範揭於御座之右朝夕觀覽欲自為註三吾時
為左春坊贊善



明名臣琬琰錄卷九